

# KOLOSI

## Kipihac wê Pol kivuu vô tibii

### Kolosi ge

<sup>1</sup> A Pol wê Anutu vînoo a ya xovôên wê ici va vông ge ên nêb a tu Yesu Kîlisi nu sinale ti. Il lig Timoti dô hixôn a,

<sup>2</sup> di xii kivuu kipihac tiga vô xam Kolosi wê xam tu Anutu nue ge. Xam ge xii lige wê xam vông i vin Kîlisi.

Il Mag Anutu i vông vizid nivîha hixôn kiyang malehe i lam hivun xam xôn.

#### *Pol xêyaa vô nivîha ên tibii Kolosi*

<sup>3</sup> Tiyi buc vîhati wê xii Timoti kitaa lec xam Kolosi ge, xii pimil Anutu wê il lig Apumtau Yesu Kîlisi ma ge,

<sup>4</sup> ên xii ngô wê xam vông i vin Yesu Kîlisi di xam xêmyaa vin lec xomxo vông vinên vîhati.

<sup>5</sup> Ilage Anutu xolac nivîha wê kiyang nôn ge val vô xam mi xam ngô. Xolac tige nêl bêga ên nêbê Anutu viac vizid hixôn nôn nivîha vîhati pyap gê lag puunê ên nêb ob vông vô xam timuên. Om môt vông vinên hixôn môt xêyaa vin lecên wê xam vông ge kehe bêga nêbê xam xovô di xam bin vizid hixôn nôn nivîha tige.

<sup>6</sup> Ilage xolac val vô xam mi xam ngô di xovô kiyang nôn wê nêl kitong lec xêyaa vin lecên wê Anutu vông vô xam ge. Om gwêbaga xolac tige vô levac vac xam mahîgun, di la vô levac vac vigwe vîhati di vô nôn nivîha vô xomxo tibeac.

<sup>7</sup> Eaplas kô xolac mi loc nêl kitong vô xam Kolosi taxlee mi xam xovô. Eaplas ge Anutu nu yuac tiyi xocbê xii ge, di xii xêmyaa vin lec i, di i le vac xii nimpilêhê mi nêl xolac di viac Kîlisi yuac nivîha,

<sup>8</sup> di Eaplas val nêl kitong vô xii lec môp xêyaa vin lecên wê Myakilôhê Ngibua vông vô xam mi xam timu vô ge.

### *Pol kitaa lec tibii Kolosi*

<sup>9</sup> Mêgem vô buc taxlee wê xii ngô kiyang lec môp nivîha wê xam mi vông ge di i val tyip gwêbaga hixôn, xii kitaa lec xam tiyi buc vihati di xii nim o ma lec kitaaên lêm. Nge, xii kitaa vô Anutu lec xam bêga ên xii nêbê i vông xovôên vô xam ên xam xovô môp nivîha vihati wê Anutu xovô nêb xam ob vông ge, di i vông xovôên levac hixôn piyôp nivîha wê Myakilôhê Ngibua vông ge i dô vac xam nilôm di hivun xam xôn.

<sup>10</sup> Xam obêc kô xovôên wê Myakilôhê Ngibua vông ge od xam ob timu vô môp wê Apumtau nue vông ge, di Anutu ob yê xam nivîha, di xam ob vông yuac nivîha wê ob vô nôn nivîha ge, di xam ob xovô Anutu di xovôên tige ob vô levac vô xam.

<sup>11</sup> Xii kitaa vô Apumtau xêkizêc kehe lec xam bêga ên xii nêbê i vông xêkizêc vô xam êdêc xam le xêkizêc di kilê viyin vihati hixôn xêmyaa nivîha,

<sup>12</sup> di xam pimil il Mag Anutu. Anutu nêb xam tiyi wê xam ob kô nôn nivîha vihati wê nêl xam lêm lec ge tiyi xocbê xomxo vông vinên vihati wê dô vac xêseac ge ob kô.

<sup>13</sup> Anutu vô il vêl ên xêkizêc yuu mapitoc wê Seten vông ge di tung il la dô vac xêkizêc yuu xêseac wê Anutu nu tuc vông ge. Nu tuc ge wê Anutu xêyaa vin lec i,

<sup>14</sup> di i vô il vêl ên il nêd nipaên di kitya il nêd nipaên vêl.

*Anutu nu tuc hixôn yuac wê i vông ge*

<sup>15</sup> Il o xê Anutu lec madnôn lêm, lêc Anutu nu tuc ge tiyi xocbê Anutu vaci, di i tu mugên ên susu vihati wê Anutu tung ge.

<sup>16</sup> Ên nu tuc tu susu lag yuu kibun vihati yang kehe, di tung susu wê il xê hixôn susu wê il xêen ma ge vihati êno, om ici va tung he angela wê xêkizêc di lê levac ge hixôn xomxo levac vihati. Anutu nu tuc tung susu vihati yang ên nêb he i pimil i lê di vông yuac i tiyi xovôen wê i vông ge.

<sup>17</sup> Nu tuc dô taxlee di susu vihati ge ti o dô hixôn i lêm. Nge, ici va tung susu vihati, om gwêbaga he dô ya xêkizêc wê ici va vông ge.

<sup>18</sup> Kîlisi hixôn il xomxo vông vinên vihati tiyi xocbê nôn tîbed, lêc Kîlisi tu il badzub. Kîlisi ge mugên, di ici va xomxo taxlee wê kidi lec maviha vac yibên ge, om tu xomxo hixôn susu vihati bazub di ti o luu i vêl lêm.

<sup>19</sup> Mêgem Anutu xovô nêb ob vông maviha yuu xêkizêc wê i vông ge vihati vô nu tuc, om vông i hivun nu tuc xôn.

<sup>20</sup> Ilage Anutu yê il hixôn susu lag yuu kibun vihati tiyi xocbê il vông vevac vô i. Lêc Anutu nêb ob vilu vô xomxo hixôn susu vihati ge i loc dô vac i kwa ngibi. Om vông nu tuc lam yib lec

xax pola di kipyax i hi sea, om nu tuc vông kisoac mi le vac il Anutu mahigun di hi ni nyagên wê Anutu vông vô il ge.

<sup>21</sup> Ilage xam dô teva ên Anutu, di xam piyôp vông vevac vô Anutu, di xam mi vông môp nipaên.

<sup>22</sup> Lêc Kîlisi lam yib lec xax pola, om vông kisoac mi le vac il Anutu mahigun di hi ni nyagên wê Anutu vông vô il ge. Kîlisi vông bêge ên nêb ob kô il mi il la le vô Anutu manôn ên Anutu i yê il tiyi xochê xomxo ngibua wê il nilôd vô paha lec di nipaên ti o yêp vô il lêm.

<sup>23</sup> Xam obêc nêb Anutu i yê xam tibêge ge od xam hêm môp vông vinên xôn pîlihi, di le xêkizêc, di susu ti i o lêc vông xam sea môp wê xam bin nôn nivîha wê xam ob kô timuên ge lêm. Xolac nêl nôn nivîha kitong vô xam mi xam ngô ilage. Xolac tige, xomxo la nêl vô xomxo kibun ga vîhati, di a Pol, a tu xolac tige nu yuac.

### *Pol ngîdu tibii Kolosi xôn*

<sup>24</sup> Gwêbaga tibii ya vông viyin yuu myavinê vô a ên wê a ngîdu xam xôn ya xolac ge. Lêc a xêgyaa vô nivîha, ên myavinê ya wê o la lec Kîlisi hixôn lêm ge, ya gên yêp. Om a ob kô vîhati lec nignivi ên i ngîdu xam wê xam vông i vin ge xôn. Ên il hixôn Kîlisi tiyi xochê nôn tibed.

<sup>25</sup> Anutu vaci vînoo a ên nêb a tu xomxo vông vinên nu yuac ti wê a ob ngîdu xam xôn ge, om vông yuac vô a ên nêb a la nêl Anutu xolac vîhati kitong i yêp seac.

<sup>26</sup> Vô buc vîhati ilage Anutu xolac wê nêl Yesu kitong ge yêp xôpacên om xomxo vîhati yang

lungên. Lêc gwêbaga, Anutu vông xolac tige lam yêp seac vô il wê il vông i vin Yesu ge.

<sup>27</sup> Anutu nêb ob nêl kitong vô il ên il xovô bêga bê kiyang wê yêp xôpacên ilage ge kiyang nivîha yang tiyi wê obêc ngîdu xomxo vihati ge xôn. Om nêl kiyang tige kitong vô xam wê xam o Yuda lêm gee êno. Kiyang xôpacên tige nêl ên nêbê Kîlisi dô hixôn xam, om xam dô bin buc wê Kîlisi obêc tung xam la dô vac xêseac wê i vông ge.

<sup>28</sup> Xe nêl Kîlisi kitong i yêp seac, di xe tixuu xomxo toto ya xovôên vihati, di xe viac kiyang nivîha vô he. Xe vông yuac tibêge ên xe nêb xe ob kô he toto mi la le vô Anutu manôn ên Anutu i yê he i tiyi xocbê xomxo wê xovô Kîlisi pyap ge.

<sup>29</sup> Om yuac tibêge yuac levac wê a vông ya xêkizêc levac wê Kîlisi vông vô a ge.

## 2

### *Piyôp yuu xovôên vihati yêp vô Kîlisi vaci*

<sup>1</sup> A nêb xam xovô bêga bê a vông yuac levac ên a nêb a ob ngîdu xam Kolosi di tibii Leodisia hixôn xomxo vông vinên vihati wê o yê a magnôn lêm ge xôn.

<sup>2</sup> Om a vông yuac levac ên a nêb xam nilôm i vô nivîha di xam xêmyaa i vin lecma, di xam kô xovôên levac ên xovôên tige i vông xam le xêkizêc vac vông vinên di i vô nôn nivîha vô xam. Di a nêb xam xovô Anutu kiyang wê yêp xôpacên ge kehe, ên kehe ge Kîlisi vaci.

<sup>3</sup> Ên piyôp yuu xovôên nivîha wê Anutu vông ge vihati yêp vô Kîlisi vaci.

<sup>4</sup> A nêl kiyang tiga vô xam ên a nêb xomxo ti i o kityoo xam ya kiyang hizi lêm.

<sup>5</sup> A dô teva lêc a xo xam tiyi xocbê a dô hixôn xam ge, om a nilôg vô nivîha ên wê xam vông môp nivîha di vông i vin Kîlisi xêkizêc ta ge.

*Xam dô hixôn Kîlisi di hôm i xôn pilihi*

<sup>6</sup> Xam vông i vin Apumtau Yesu Kîlisi pyap, om xam lêc timu vô i vixa,

<sup>7</sup> di hôm Kîlisi xôn xêkizêc i tiyi xocbê xax ngilôhò la hôm kibun xôn ge, di xam le xêkizêc hixôn Kîlisi i tiyi xocbê xumac le lec teac kisii mi le pilihi. Om xam le xêkizêc ya vông vinên wê xe tixuu xam ya ilage. Di xam pimil Anutu i tiyi buc vihati.

<sup>8</sup> Xam viac xam nivîha, ên xomxo ya nêb ob kityoo xam di ku xam xôn ya kiyang vaxvax wê ob vô nôn nivîha lêm ge. Kiyang wê he mi nêl ge he nêl tiyi xocbê bue vông ilage, tiyi xocbê môp yuu xovôên wê yêp gê kibun ga. Di he o nêl kiyang nôn wê Kîlisi vông ge ti lêm.

<sup>9</sup> Xam xovô pyap ên xam nêbê Kîlisi ninivi tiyi xocbê xomxo kibun ga, lêc Anutu vông xêkizêc yuu xovôên wê i vông ge vihati hivun Kîlisi xôn, om yuu xôn tiyima.

<sup>10</sup> Di xam dô hixôn Kîlisi om Anutu vông maviha dôên nôn hivun xam xôn. Kîlisi ge wê luu xomxo wê piyôp levac ge hixôn xêkizêc vihati ge vêl.

<sup>11</sup> Xomxo Yuda mi gôl he ninivi ên he nêb i nêl kitong bê he tu Anutu nue. Di xam êno tu Anutu nue, lêc xam o gôl nimnivi lêm. Nge, xam vông i vin Kîlisi om Kîlisi lipac xam nilôm vô paha lec di

vông xam sea môp nipaên wê xam nimnivi xovô ge, om ge nêl kitong nêbê xam tu Anutu nue.

<sup>12</sup> Môp wê xam lipac mia ge tiyi xocbê xam wib hixôn Kîlisi, di dô vac lôva hixôn i, di kidi lec mamviha vac yibên hixôn i, ên xam vông i vin ên xam nêbê xêkizêc wê Anutu vông ge vông Yesu kidi lec mavaha vac yibên.

<sup>13</sup> Ilage xam vông môp nipaên viyang viyang ge di timu vô môp kibun wê xam nilôm xovô ge. Om xam dô tiyi xocbê xam wib di la dô teva ên Anutu. Lêc Anutu kitya xam nêbê nipaên vêl om vông xam dô mamviha hixôn Kîlisi.

<sup>14</sup> Xolac wê Anutu vông vô Moses ge nêl il nêd nipaên kitong. Lêc Anutu hi il nêd nipaên vihati la lec xax hixôn Kîlisi, om il wê il vông i vin ge, Anutu kitya il nêd nipaên vêl di vông xolac tikwê wê Moses vông ge tip la vêl.

<sup>15</sup> Môp yibên wê Kîlisi vông ge vông xêkizêc wê Seten he nue yuac vông ge tip la vêl, om Kîlisi nginoo Seten he nue yuac vêl di vông xomxo yê he tiyi xocbê susu vidaaên.

### *Xam wib hixôn Kîlisi*

<sup>16</sup> Kîlisi kitya xam nêbê nipaên vêl, om le i lêc ngô kiyang wê xomxo ya kidu xam ên nêbê xam timu vô ge lêm. Ên môp wê he nêl ge môp kibun, xocbê môp yaên yuu numên, di môp lec klismas paha hixôn dentuc paha di da vihati.

<sup>17</sup> Môp tigege tixuuên pileva, ên he tixuu lec môp wê ob val timuên ge. Lêc Kîlisi ge nôn vixôhilôg.

<sup>18</sup> Xomxo ya yong he ên nêbê he yê vivia, di yong he ên nêbê he vông heche va vô nipwo lec

di yev vixa kitu vô angela. Lêc xam vibu he di ngôên he kiyang i ma. Ên he so ên he nêbê môt wê he vông ge luu xam vông môt vêl. Lêc he yong he pîleva, ên pîyôp wê he vông ge la timu vô môt kibun ga,

<sup>19</sup> di he o hôm Kîlisi xôn pîlihi lêm. Il hixôn Kîlisi tiyi xochê xomxo nôn tîbed, lêc Kîlisi tu il badzub. Di bazub viac nôn vihati di vông kîlôhê hixôn len di ninivi vihati kitucma tu nôn tîbed di lig mi vô levac ya xêkizêc wê Anutu vông ge.

<sup>20</sup> Xam wib pyap hixôn Kîlisi om xam sea môt kibun ga vihati. Bêna lêc xam lax vông môt tiyi xochê xomxo kibun ga ge? Bêna lêc xam la vac xolac baba wê nêl bêga ên nêbê,

<sup>21</sup> “Le i lêc hôm susu tîgee lêm, di le i lêc ya yaên tîgee lêm, di le i lêc vyax vigêm lec susu tîgee lêm.”

<sup>22</sup> Susu wê xolac baba nêl lec ge, il ob vông yuac ya, lêc he xôa obêc ma timuên. Xomxo kibun ga heche va nêl kiyang lec susu tîgee.

<sup>23</sup> Di he kitaa vô angela, di he yê heche va nîpâên di vông he ninivi vô nîpâên. Môt tîgee hi xomxo manôn lec om he so nêb môt nivîha. Lêc môt tîgee o tiyi wê ob vông he kol he ninivi ên nîpâên ge lêm.

### 3

#### *Anutu tipî vô il kidi lec madvîha hixôn Kîlisi*

<sup>1</sup> Anutu tipî vô xam kidi lec mamvîha hixôn Kîlisi, om xam vông nîlôm i loc vô nôn nivîha wê yêp lag puunê ge. Ên Kîlisi tu il nêd levac mi la dô lag puunê vô Anutu vigê hiyôv.



<sup>2</sup> Xam vông piyôp i loc diluhu vô nôn nivuha wê yêp lag puunê ge, di le i léc vông piyôp i loc vô susu kibun ga lêm.

<sup>3</sup> Ên xam wib hixôn Kilisi, om Kilisi hôm maviha dôên wê xam vông ge mi viac i yêp nivuha, di kehe yêp vô Anutu.

<sup>4</sup> Kilisi ge maviha dôên wê il vông ge kehe, om vô buc timuên wê Kilisi obêc lop mi lôm le seac ge od xam êno obêc lam le pikeb i vac xêseac wê i vông ge.

### *Il vô paha lec*

<sup>5</sup> Xam obêc kô xêseac wê Kilisi vông ge, om xam léc sea môm kibun ga wê yêp vac xam nilôm ge i loc yêp xel. Môm nipaên tigeê bêga nêbê môm yôdac vêx yuu vux, môm ningeac, môm yôdac viyang viyang wê xam nimnivi xovô ge, môm nipaên wê xam nilôm kidu xam ên nêb xam vông ge, di môm wê xam wê xomxo ngwe susu di nilôm yetac ên ge, ên môm tige tiyi xochê xam yev vixam kitu vô anutu kityooên.

<sup>6</sup> Anutu xêyaa vô myavinê vô xomxo wê vông môm nipaên tibêgee, om obêc vông myaviwen nipaên vô he.

<sup>7</sup> Ilage xam dô hixôn xomxo wê mi vông môm nipaên tibêgee om xam mi timu vô môm nipaên tibêgee vihati.

<sup>8</sup> Léc gwêbaga a ob nêl vô xam bê xam sea môm nipaên vihati i loc yêp xel. Môm nipaên bêga nêbê môm kunacmaên, di môm xêyaa myavinê, di môm wê xam nêb xam ob vông xomxo ngwe vô nipaên ge, di môm wê xam nêl kiyang nipaên lec xomxo ge, di môm wê

kíyang yacyac tyip vac xam myam di vông xam ngilooma di pipingma ge.

<sup>9</sup> Le i léc nêl kíyang kityooên vôma lêm, ên ilage xam sea môp nipaên wê yêp vac xam nilôm ge la vêl,

<sup>10</sup> di xam vô paha lec pyap, ên Anutu vaci wê vông xam nilôm vô paha lec ge, di Anutu ob vông yuac vac xam nilôm i tiyi buc vihati ên xam xovô i di dô i tiyi xocbê ici va ge.

<sup>11</sup> Om xomxo Glik di xomxo Yuda, di he wê gôl ninivi ge, hixôn he wê o gôl ninivi lêm ge, di tibii madiluhu, di xomxo vimen wê dô vac nita ge, di xomxo wê vông yuac vidaaên vô xomxo ge, hixôn he wê viac heche va yuac ge, Kilisi yê il vihati tiyima, ên Kilisi vaci wê tu il vihati kehe di i dô hixôn xomxo vihati.

*Môp nivîha wê il ob timu vô ge*

<sup>12</sup> Anutu vinoo xam pyap ên nêb xam tu i nue, di i xêyaa vin lec xam. Mêgem xam léc timu vô môp nivîha bêga bê xam xo vîgwe pisiv ên xomxo, di vông nivîha vô he, di xam pilepac xam mi vô nipwo lec, di xam lum nêl kíyang malehe vô xomxo, di le i léc vông nipaên vac nipaên lêm.

<sup>13</sup> Nge, lime ti obêc vông nipaên vô ông ge od ông kitya i nêb nipaên vêl di vông nivîha vô i. Ên il Apumtau kitya xam nêb nipaên vêl, om xam êno, xam kitya lime nêb nipaên vêl.

<sup>14</sup> Di xam xêmyaa i vin lecma, ên môp xêyaa vin lecmaên wê ob vông môp nivîha vihati ngiduma xôn di ob vông xam dô kidu tibed.

<sup>15</sup> Kilisi tyuc il ên nêb il tu nôn tibed di dô vac kíyang malehe nilô. Om xam vông kíyang

malehe wê Kilisi vông ge i yêp vac nilôm ên i viac xam, di xam pimil Anutu i tiyi buc vihati.

<sup>16</sup> Xam hôm Kilisi kiyang xôn pilihî mi i yêp vac nilôm di xam xovô i nivîha. Di xam tixuu lime ya xolac di viac kiyang nivîha voma ya xovôên nivîha vihati. Xam pimil Anutu vac nilôm di vông lilo wê pimil ên i lê ge hixôn lilo da, di lilo wê Myakilôhông Ngibua vông vô xam ge.

<sup>17</sup> Di kiyang vihati wê xam ob nêl ge hixôn yuac vihati wê xam ob vông ge, od xam nêl xam kiyang di vông xam yuac vihati lec Apumtau Yesu lê, di xam pimil il Mag Anutu hixôn lec Yesu lê.

*Kiyang lec vux hixôn vinêe nue*

<sup>18</sup> Xam vêx gee, xam loc vac liyame vông kiyang kwa ngibi, ên mông tibêge tiyi wê Apumtau nêbê vêx ob vông ge.

<sup>19</sup> Xam vux gee, xam xêmyaa i vin lec vinême, di le i lêc vông nipaên vô he lêm.

<sup>20</sup> Xam nuge, xam vô ninyam lehe vô kiyang vihati wê tame mame nêl ge di loc vac he kwa ngibi, ên Apumtau ob yê mông tibêge nêb nivîha.

<sup>21</sup> Di xam mae, le i lêc vông nume nilô i vô nipaên di he xêyaa i vô myavinê lutibed vô xam lêm, ên xam ob vông he nilô vô viyin di he ob xo ên nêb xam xêmyaa o vyac vin lec he lêm.

*Kiyang lec xomxo levac hixôn nue yuac*

<sup>22</sup> Xam wê xam tu xomxo levac nue yuac ge, xam loc vac kiyang vihati wê xomxo levac nêl ge kwa ngibi. Le i lêc kityoo di hi xomxo levac manôn lec ya yuac lêm, ên ge tiyi xocbê xam nêb xomxo i yê xam nivîha. Om xam nilôm i o lêc

vông yuu lêm. Nge, xam nilôm i loc tived vô yuac wê xam ob vông ge, di xam xona ên Apumtau.

<sup>23</sup> Di yuac vihati wê xam vông ge, xam vông ya nilôm tived di nim i o léc ma lêm, ên tiyi xocbê xam o vông yuac vô xomxo kibun ga ti lêm. Nge, xam vông yuac vô Apumtau.

<sup>24</sup> Xam xovô bê xam obêc vông xam yuac i yêp nivuha ge od vô buc timuên Apumtau obêc vông nô n nivuha wê nêl xam lêm lec ge vô xam, ên yuac wê xam mi vông ge, xam vông vô Apumtau Yesu Kilisi.

<sup>25</sup> Léc xomxo wê vông môp nipaên ge, Anutu obêc vông myaviwen vô he lec nipaên wê he toto vông ge, ên Anutu obêc yê xomxo mangwe levac di mangwe nipwo lêm. Nge, yê il vihati tiyima.

## 4

<sup>1</sup> Xam xomxo levac wê viac nume yuac ge, xam vông nivuha vô he di viac he nivuha. Xam xovô bê xam êno, xam nê m levac dô kisii ganê di yê môp wê xam vông ge.

### *Kiyang lec môp kitaaên hixôn xolac nêlên*

<sup>2</sup> Xam hô m môp kitaaên xôn pilihi i tiyi buc vihati di seaên i ma. Wê xam obêc kitaa ge od xam vông piyôp i loc vô kitaaên vaci, di xam pimil Anutu ya kitaaên.

<sup>3</sup> Di xam kitaa vô Anutu lec xe êno bêga bê Anutu i ngidu xe xôn di hilung môp vô xe ên xe nêl Kilisi kiyang wê yêp xôpacên ilage i yêp seac. Gwêbaga tibii tung a lam dô vac xumac kalabuhu ga ên wê a nêl xolac ge.

<sup>4</sup> Om xam kitaa lec

a, ên buc wê a obêc nêl Kilisi xolac ge od a nêl xolac i yêp seac, ên yuac tige wê Anutu vông vac a vigêg.

<sup>5</sup> Môm wê xam vông vac tibii madiluhu mahigun ge, xam vông ya xovôên nivaha i tiyi buc vihati di xam o sea buc ti i loc vidaaên lêm.

<sup>6</sup> Kiyang vihati wê xam ob nêl ge, xam nêl kiyang nivaha wê ob vô nôn nivaha ge. Ên xam obêc nêl bêge ge od xam ob tiyi wê xam ob luu kiyang nivaha vô xomxo toto ge.

*Pol vông Tikikas yuu Onisimas la vô tibii Kolosi*

<sup>7</sup> Tikikas ob nêl a kitong vô xam. Tikikas ge il lig vông vinên ti wê il xêdyaa vin lec i ge, di i xomxo ti wê vông yuac nivaha ge di vông Apumtau yuac hixôn xe.

<sup>8</sup> Om a vông i loc vô xam ên a nêb i loc nêl kitong bê xe dô tibêna vac xumac kalabuhu ga, ên i vông xam nilôm i vô viyin maên.

<sup>9</sup> Di a vông Onisimas i loc hixôn Tikikas. Onisimas ge xam Kolosi lime ti di il lig vông vinên ti wê vông Anutu yuac nivaha ge, di il xêdyaa vin lec i. Om yuu Tikikas ob nêl kitong vô xam lec viyin yuu nivaha wê tulec a vac vigwe ga.

*Kiyang viwen timuên*

<sup>10</sup> Alistakas wê lam dô vac xumac kalabuhu ga hixôn a ge nêl vidiên vô xam, di Mak wê Banabas ngidê ge êno nêl vidiên vô xam. Mak obêc miloc vô xam ge od xam kô i lec nivaha i tiyi xocbê kiyang wê a vông i loc vô xam ilage.

<sup>11</sup> Di Jisas wê lê ngwe nêbê Jastas ge nêl vidiiên vô xam. Xomxo Yuda tibeac vông i vin Yesu, lêc Alistakas, Mak, di Jastas, yonbed wê yon vông yuac hixôn a mi xe nêl Anutu xolac vô tibii tibeac. Di yon ge wê yon ngidu a xôn di vông a nilôg vô viyin maên.

<sup>12</sup> Eaplas nêl vidiiên vô xam. Eaplas ge xam Kolosi lime ti wê tu Yesu Kilisi nu yuac, di i kitaa vô Anutu lec xam tiyi buc vihati nêb Anutu i vông xam le xêkizêc vac vông vinên wê xam vông ge, di i vông xovôên vô xam ên xam xovô môp nivîha vihati wê Anutu xovô ên nêb xam vông ge.

<sup>13</sup> A xovô pyap om a nêl kitong vô xam bêga bê Eaplas vông yuac levac ên nêb ob ngidu xam Kolosi hixôn tibii Leodisia di he Hilapolis xôn.

<sup>14</sup> Il docta Luk wê il xêdyaa vin lec i ge hixôn Dimas, yuu nêl vidiiên vô xam.

<sup>15</sup> Xam nêl vô lime vông vinên vac vigwe Leodisia bê a nêl vidiiên vô he. Di xam nêl vô vêx ti lê nêbê Nimpa hixôn xomxo vông vinên wê he kitucma mi yê da vac i ben ge bêga bê a nêl vidiiên vô he êno.

<sup>16</sup> Xam obêc kitong kipihac tiga pyap ge od xam vông i loc vô konglegesen vac vigwe Leodisia ên he i kitong êno. Di kipihac wê a vông i la vô he Leodisia ge, he i vông i lam vô xam Kolosi ên xam êno kitong.

<sup>17</sup> Xam nêl vô Akipas bêga bê, “Ông viac yuac wê Apumtau vông vô ông ge di vông yuac tige i vô nôn nivîha.”

<sup>18</sup> A, Pol, a kivuu kiyang tiga ya vigêg di a nêl vidiiên vô xam. Xam lêc xovô wê a gên dô vac

xumac kalabuhu ga. Vızid nivıha wê Anutu vông  
ge i dô hixôn xam vıhati.

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 18 Apr 2025 from source files dated 31 Aug 2023

3d2c844d-4bc8-590b-bbf2-3a5fcd1f7ad8